

## Evening Dogri News Bulletin, 02 June 2024

इवनिंग डोगरी न्यूज़ बुलेटिन

समे-18:15 Hrs

### Headlines

- 1 भारतीय जनता पार्टी अरूणाचल प्रदेश च सत्ता च बनी दी रौहग। सिक्किम क्रांतिकारी मोर्चा सिक्किम च सरकार बनाग।
- 2 एग्जिट पोल मुजब जम्मू-कश्मीर च 3 लोकसभा सीटां एन.सी ते 2 बीजेपी जित्तोग।
- 3 मुख् चुनां अधिकारी होरें मतगणना दी त्पारिएं दा जायजा लैता। उनें भारतीय चुनां आयोग दे दिशा-निर्देशें दी सख्ती नै पालमा करने पर जोर पाया।
- 4 इस बरे अजें तगर 5 म्हीने दौरान श्री माता वैष्णो देवी दी जात्तरा लेई 40 लक्ख श्रद्धालु आए न।
- 5 मुकामी आतंकवादिएं दी गिनतरी 20-22 तगर, विदेशी आतंकवाद इक चुनौती, गलाया डीजीपी आर.आर स्वैन होरें।

<><><><><><>

### Final-Assembly Result

अरूणाचल प्रदेश ते सिक्किम च विधानसभा चुनाएं दी मतगणना दे सब्बै नतीजे थ्होई गे न। अरूणाचल प्रदेश च भारतीय जनता पार्टी नै सत्ता बरकरार रक्खी ऐ जिल्ले के सिक्किम च सत्ताधारी सिक्किम क्रांतिकारी मोर्चा दी इक्क तरफा जित्त होई ऐ। पूर्वोत्तर दे इनें दौनें राज्यें च विधानसभा चुनाएं दे वोटें दी अज्ज गिनतरी कीती गेई। अरूणाचल प्रदेश दिएं 60 ते सिक्किम दिएं 32 विधानसभा सीटें लेई लोकसभा चुनाएं दे पैहले चरणे च 19 अप्रैल गी कनोकत्री वोट पाए गए हे। अरूणाचल प्रदेश च पैहले गै भाजपा नै राज्य विधानसभा चुनाएं च 10 सीटें पर बिजन विरोध दे जित्त दर्ज करी लैती ही ते बाकी दियें 50एं सीटें चा भाजपा नै 36 सीटां अपने नां कीतियां। नेशनल पीपल्स पार्टी नै 5, नेशनलिस्ट कांग्रेस पार्टी ते आजाद मेदवारें 3-3, पीपल्स पार्टी ऑफ अरूणाचल प्रदेश नै 2 जिल्ले भारतीय राश्ट्री कांग्रेस नै 1 सीट पर जित्त दर्ज कीती ऐ। तोआई सिक्किम च सब्बै 32 सीटें दे घोषित नतीजें च सिक्किम क्रांतिकारी मोर्चा एस.के.एम नै 31 सीटां जित्तियां न। सिक्किम डेमोक्रेटिक फ्रंट एस.डी.एफ शडा इक्क सीट जित्तने च कामयाब रेई।

<><><><><><>

### LS –Exit Poll

4 जून गी लोकसभा चुनाएं दी मतगणना शा पैहले निजी टीवी चैनलें ते होर दुइएं अजेंसिएं चुनां परेंत दे सर्वे दे नतीजे जारी कीते न। मते सारे एग्जिट पोल शारा देआ करदे न जे भाजपा दी नुमायंदगी आह्ला राश्ट्रीय जनतांत्रिक गठबंधन एनडीए लोकसभा चुनाएं च दसत्ता बरकरार रखने लेई तैयार ऐ। एग्जिट पोल दस करदा ऐ जे एनडीए 543 मिम्बरी लोकसभा च दो तिहाई बहुमत हासल करी सकदा ऐ जेडा 272 सीटें आहली बहुमत सीमा गी पार करी जाग। इनें लोकसभा चुनाएं च भाजपा दी नुमायंदगी आहले एनडीए ते कांग्रेस दी नुमायंदगी आहले आई.एन.डी.आई गठबंधन बश्कार सिद्धा मुकाबला हा। सत्ताधारी भाजपा गी प्रधानमंत्री नरेंद्र मोदी हुंदी अगुवाई च उप्परोतली त्री बारी सत्ता च औने दी मेद ऐ। एग्जिट पोल च जम्मू-कश्मीर च नेशनल कांफ्रेंस गी 3 ते बीजेपी गी दो सीटां मिलने दा अंदाजा लाया हा।

<><><><><><>

### CEO-Counting

जम्मू-कश्मीर दे मुख् चुनां अधिकारी पांडुरंग के पोले होरें 4 जून गी होने आहली लोकसभा चुनाएं दी मतगणना शा पैहले निर्वाचन भवन जम्मू च सरबंधत जिले च तैयारियें दी व्यापक समीक्षा कीती। श्री पोले होरें यू.टी च मतदान दे कामयाब ते अमन-रमानदारी कन्नै सम्पन्न करोआने ताई जिला प्रशासन गी बदाई दित्ती। ध्यानजोग ऐ जे कश्मीर घाटी च 1998 आहले दहाके मगरा इस बारी सब्बनें शा बहु मतदान दर्ज कीता गेआ ऐ। मुख् निर्वाचन अधिकारी होरें आर.ओ ते होर दुए मुतल्लका अफसरें गी डाक राएं आए दे वोटें ते ई.टी.पी.बी.एस दी गिनतरी लेई लोड्चदे प्रबंध करने दे निर्देश जारी कीते।

<><><><><><>

### RO-Jammu

जम्मू संसदीय क्षेत्र दे रिटर्निंग अफसर सचिन कुमार वैश्य होरें सरकारी पार्लियामानी कालेज ते एम.एम.एम कॉलेज च बनाए गेदे मतगणना केंद्रें दा कल व्यापक निरीक्षण कीता। निरीक्षण दा मकसद सुचारू ढंग्गै सिर पारदर्शी ढंग्गै कन्नै मतगणना प्रक्रिया लेई सब्बै लोड्चदे प्रबंध यकीनी बनाना हा। उनें नीम फौजी बलें ते जम्मू कश्मीर पुलिस दे जवानें दी तैनाती दे कन्नो-कन्नो वोटें दी गिनतरी करने आहले कर्मचारियें ते एजेंटें ताई कीती गेदी बवस्था दा बी जायजा लैता। दौरे दौरान उनें बिजली, पीने आहले पानी, मीडिया प्रबंधन ते प्रवेश पास जारी करने आहली बवस्था दी बी समीक्षा कीती।

<><><><><><>

### Rajouri-Arrangements

पी.जी कॉलेज राजौरी च सुरक्षा दे सुद्धे बंदोबस्त कीते गेदे न जित्थे 4 जून गी अनंतनाग-राजौरी लोकसभा चुनां दी मतगणना कीती जानी ऐ। सुरक्षा लेई कीते गेदे प्रबंधें च सुरक्षा कर्मियें दी तैनाती ते जांच आहिलियें थाहरें गी बदाना, पी.जी कालेज राजौरी दे आले दोआले 24 घंटे निगरानी शामिल ऐ। इंदे अलावा पूरे कालेज परिसर च सी.सी.टी.वी कैमरे बी लागे गेदे न।

<><><><><><>

### Health-Deptt.

सेहत मैहकमा डोडा पाससेया उनें बमारिएं बारै जेडियां संक्रमण कन्नै नेई हुंदियां हैन बारै इक शिविर लाया गोआ ते लोकें दी जांच कीती गेई। इस शिविर दा सरिस्ता मुख्ब सेहत अधिकारी डॉ. ओम कुमार ते ब्लाक मेडिकल आफिसर हुंदी दिक्ख-रिक्ख च लग्गा। इस दौरान मरीजें दी जांच कीती गेई ते उनेंगी परामर्श बी दित्ता गोआ।

<><><><><><>

### DC-Samagra

पुंछ दे डिप्टी कमिशनर यासिन.एम चौधरी होरें इक बैठक लाइए जिले च समग्र शिक्षा कार्यक्रम तैहत कम्में दा जायजा लैता। डिप्टी कमिशनर होरें मिथे गेदे कम्में गी समें सिर पूरा करने दे निर्देश दित्ते। समग्र शिक्षा बारै स्कूली शिक्षा मैहकमे दे जायंट डरैक्टर होरें पावर प्वाइंट प्रेजेंटेशन दित्ती। उनें प्रोग्राम तैहत बक्ख-बक्ख चाल्ली दे कम्में बारै बैठक च रमानदारी दित्ती।

<><><><><><>

### Mata Vaishno Devi

इस बरे 31 मई तगर 40 लक्ख शा बद् तीर्थ यात्रुएं त्रिकुटा प्हाडियें च स्थित माता वैष्णो देवी दे पवित्र गुफा च दर्शन लेई पुज्जे। 31 मई, तगर 40 लक्ख 30 ज्हार 927 भक्ते मंदर च माता दे दर्शन कीते जेडे पिछले 5 बरें दे मुकाबले च अपने आप च रिकार्ड ऐ। जंदे बरे इस्सै अवधि च यात्रा करने आहलें दी गिनतरी 38 लक्ख 47 ज्हार 584 ही। अधिकारियें दस्सेया जे माता वैष्णो देवी मंदर मुख्ब धार्मिक सैलसफें आहिलियें थाहरें च इक्क ऐ जेडा देस विदेश थमां यात्रुएं गी अपनी बक्खी आकर्षित करदा ऐ। अफसरें दस्सेया जे हर ध्याडे कटडा बेस कैप पुज्जने आहलें दी गिनतरी 40 ज्हार होई गेई ऐ।

<><><><><><>

### Amarnath-Yatra

औंदी श्री अमरनाथ जी दी जातरा दी त्यारिएं दा जायजा लैने लेई उधमपुर दियां डिप्टी कमिशनर सलोनी राय होरें इक बैठक लाई। बैठक दौरान बक्ख-बक्ख मैहकमें दे अफसर ते होर दुए नुमाइंदे मौजूद हे। इस दौरान यात्रा दी त्यारिएं बारै जिंदे च रौहना, बौहना, बिजली, आरजी शौचालय, साफ-सफाई, यातायात प्रबंधन, सुरक्षा बंदोबस्त, नियंत्रण कक्ष, चीजे-बस्तें दी कीमतें दी जांच, तालमेल सरबन्धी कमेटियां, आपात स्थिति कन्नै निब्वडने ते होरनें दुइए चीजे दा जायजा लैता गोआ। डिप्टी कमिशनर होरें सारें प्रतिभागिएं पर जोर पाया जे ओहू पूरे उत्साह कन्नै कम्म करन ते आपूं चै नेडमां तालमेल बनान तां जे यात्रा गी सुचारू ढंगे सिर करोआना यकीनी बनाया जाई सकै।

<><><><><><>

### Kheer-Bhawani

कश्मीरी पंडित समुदाय दे सैकडें बद्दे श्रद्धालु 12 जून गी जम्मू-कश्मीर परिवहन निगम दियें बसें च सवार होइये माता खीर भवानी दी सालाना यात्रा लेई रवाना होडन। इस बरै मेला 13 जून गी कश्मीर घाटी दे गांदरबल जिले दी तुलमुला च मनाया जाग। अधिकारियें मुजब प्रशासन आस्सेया यात्रुएं दी रूट्टी दे कन्नोकन्नी होर सब्बै लोडचदे प्रबंधें दी बवस्था कीती जा रदी ऐ। गांदरबल दी तुलमुला च पूजा-अर्चना करने परेंत यात्रु बक्ख-बक्ख मंजिलें बक्खी रवाना होडन।

<><><><><><>

### DGP-Security

पुलस महानिदेशक आर.आर.स्वैन होरें कल आखेआ ऐ जे जम्मू कश्मीर च आतंकवाद दा ध्यान एल्लै मकामी आतंकवादिएं कोला हटिये बाहले आतंकवादिएं पर केन्द्रत होई गेदा ऐ ते लोक आतंकवादिएं दी गिनतरी हुन बडी गै घट्ट रेही गेदी ऐ। उनें आखेआ जे इसलै मुख्ब चुनौती विदेशी आतंकवादी न, जिंदे अंदर कट्टरवाद ते भारत खलाफ दा जैह भरिये इक बक्खी भेजेआ जा'रदा ऐ। कल

मीरा साहब जम्मू च इक कार्यक्रम दे बाहे पत्रकारें कन्नै गल्लबात करदे होई उनें आखेआ कोई 4-5 बरें पैहले लोकल आतंकवादिणं दी गिनतरी 150-200 तगर होंदी ही जेह्डी ऐल्लै मसां खिच्चियै कोई 21-22 दे कोलकाल रेही गेदी ऐ।

<><><><><><>

### Dogri-KG

नमीं डोगरी संस्था नै प्रेस क्लब जम्मू च इक टकोहदी कवि गोष्ठी दा सरिस्ता कीता। गोष्ठीदा सरिस्ता कीता। गोष्ठी च डोगरी साहित्य दियां मन्नी-परमन्नी दिआं हस्तियें शिरकत कीती ते गजल, गीत, कविता ते चौमुखे जनेई बक्ख-बक्ख विधायें च कविता पाठ कीता। गोष्ठी दी प्रधानता साहित्य अकादमी पुरस्कार विजेता ते आकाशवाणी दे साबका निदेशक पद्यमन्त्री जतिंद्र उधमपुर आई.बी.एस होरें कीती। कवियें देशभक्ति, पर्यावरण, रोमांस, नशाबंदी, महिला सशक्तिकरण, बदलारदी समाजी बवस्था, डिजिटल दुनिया जनेय विशें पर कविता पाठ कीता।

<><><><><><>

### DDC-Kisthwar

किश्तवाड़ दे जिला विकास कमिशनर डॉक्टर देवांश यादव होरें कल इक्क बैठक दी प्रधानता करदे होई पंचैत विकास सूचकांक मापदंडें दी बिनाह पर पंचैतें दे प्रदर्शन दी समीक्षा कीती। बैठक च पी.बी.आई दे डाटा संग्रह फार्में मताबक डाटा सत्यापन दी प्रगति पर टकोहदा ध्यान दिता गेआ। इस मौके पंचैत विकास सूचकांक पी.आई.बी दे नशाने पर व्यापक चर्चा होई जेडी पूरी यू.टी च पंचैतें दे प्रदर्शन गी मापदा ऐ।

<><><><><><>

### DDC-Kishtwar

किश्तवाड़ दे डीडीसी होरें आपदा प्रबंधन कमेटीणं दे कम्मकाज गी मजबूत करने, जिले च पानी दे टेस्टें गी सख्ती कन्नै करने, स्कूल नेई जाने आहले बच्चें गी नामांकित करने ते पंचैत दे इलाकें च स्कूल मानकें गी यकीनी बनाने दियें कोश्टें पर सरबंधत मैहकमे दियें सांझी कोश्टें पर बल पाया। डीडीसी होरें अधिकारियें गी आखेआ जे ओह 5 जून तगर डी.एस.एफ दी बकाया जानकारी गी खीरी शक्ल देन तां जे तौलें ते सटीक डेटा सत्यापन दी सहूलत थ्होई सकै।

<><><><><><>

### Vijay Diwas

कारगिल विजय दिवस रजत जयंती दे सरबंधै च भारतीय सेना नै मुकामी लोकें, साबका फौजिणं, वीर नारिणं दी मौजूदगी च जम्मू-पुंछ राष्ट्रीय जरनैली शिडक पर शहीदें दे लिदान दे चेत्ते च ते उंदे सम्मान च इक झंडा लाया गेआ। भारतीय सेना आस्सेआ कारगिल विजय दिवस रजत जयंती समारोह दे सरबंधै च द्रौड़, जागरूकता अभियान, मेडिकल शिविर, खेडू गतिविधिणं, बाइक रैली वगैरा दा सरिस्ता कीता गेआ।

<><><><><><>

### CRPF-Raising Day

केंद्रीय रिजर्व पुलस बल दी 75 बटालियन नै रामबन दे चंद्राकोट च स्थित अपने मुख्यालय च अपना 39मां स्थापना दिवस जोश जज्बे कन्नै मनाया। 2010 थमां बटालियन जम्मू-कश्मीर च तैनात ऐ ते उधमपुर ते रामबन जिलें च एनएच-44 दे 46 किलोमीटर लम्में हिस्से दी सुरक्षा च महत्वै आहली भूमिका निभा करदी ऐ। इस मौके जिला अस्पताल रामन दे सहयोग कन्नै रक्तदान अभियान चलाया गेआ जेदे च 20 अफसरें ते जवानें आपूं अपनी मर्जी कन्नै रक्तदान कीता। इत्थें इक मेले दा बी सरिस्ता कीता गेआ जेदे च भारत दे बक्ख-बक्ख इलाकें दे पकवान ते मनोरंजक खेडुं दी पेशकश करने आहले स्टाल लाए गेदे हे। मेले च यूनिट कर्मियें ते उंदे परोआर आहलें जोश कन्नै हिस्सा लैता। इस मौके बैडमिंटन, वालीबॉल, फायरिंग, शतरंज ते होर केई मुकाबले बी करोआए गे जेदे च कर्मिये ंअपने फन ते खेडू कौशल दा प्रदर्शन कीता।

<><><><><><>